

SESSIONI URDINARIA DI U 2019

RIUNIONI DI U 4 di luddu di u 2019

N° 2019 / M2/ 05

**QUISTIONI URALI DIPUSITATA DA Alexia Villanova
À nomu di u gruppu « Custruimu l'Avvene »**

Ughjettu : Pulitica di l'energia è di l'ambienti di a Cullettività di Corsica

Sgiò Prisedenti di l'Agencia Acconciu, Urbanisimu è Energia di a Corsica,
Sgiò Prisedenti di l'Uffiziu di l'Ambienti di a Corsica,
Cari cunsiglieri esecutivi,

U 25 di ghjugnu scorsu, fù torna tuccata a Francia da una sciappittana maiò, è attempu chì si facia a discursata in l'Assemblea naziunali annant'à a leghji energia è clima, l'Altu Cunsigliu di u Clima publicava u so prima rapportu incù una cunclusioni sputica : « A Francia hà fattu sforzi, ma ùn bastani micca ».

Sò di più in più numarosi i chjami pà scioglia i cuscenzi, semi in faccia à una situazione scunnisciuta è critica. Si sò multiplicati i rapporti spaventosi di u GIEC, ùn firma pocu tempu è i risultati ùn ci sò micca. L'omu si devi da rifletta à u so rapportu à u mondu. Sta quistioni ci tocca à tutti è minaccia l'Umanità sana. È d'altrondi a Corsica si pò ritruvà in prima ligna di stu scumpientu di pettu à a so insularità.

A sappemi chì a salvezza di l'ambienti è a transizioni ecologica sò i fundamenti di u vosciu impegnu. A sappemi chì i vosci ughjettivi sò l'autonomia energetica à prò di l'energii rinnovelluvuli. Forsi aspitteti assai di a ghjunta di u Primu Ministru è di u Ministru di a transizioni energetica. Semi da capu di u vosciu impegnu è i di i difficoltà chè vò scuntreti.

Azzioni e riflessioni sò dighjà stati fatti sottu à a voscia mandatura in duminii varii. Ma di pettu à l'urghjenza, vi vulemi sprimà davant'à st'Assemblea i nosci pinseri. A prutizzìu di l'ambienti è a transizioni energetica si devini d'essa una priorità maiori. Tandù, aspittendu i cumpetenzi è finanziamenti nicissarii à a missa in baddu di un prughjettu sanu, pudeti oghji ch'oghji influinzà a pulitica.

Senza ad aspittà di u Statu, pudaremi spirà ch'edda sia missa in cor'di i vosci pulitichi publichi l'azzioni climatica ? Di pettu à l'ughjettivi è i vulintà francesi chi ùn bastani pocu è micca, pudarà a Cullettività avanzà certi cambiamenti ? (trasporti, mulizzi, sviluppu di a filiera di l'idrogenu, svlippu di l'energii solari, sviluppu di i studi scientifici, è soprattuttu di fà li vena più prestu certi cambiamenti decisi à u liveddu francesi...). Ch'ne sarani i vosci ambizioni ?

A noscia isula pò essa addibbulita di sta situazioni ma pò diventa dinò un laboratoriu è un pricursori di sti transizioni nicissarii. Semi sicuri di u vosciu impegnu è aspitemi assai par l'annu ch'veni.